

全華叢書

全華叢書

溪之寇應氏杜氏以乙未冬溢出永康境上殺掠以
逞嘉祐楚然曰鄉鄰有急可坐視之乎走縣白令願
助官殄寇令問安所得兵乎對曰募武健之士又問
安取錢乎對曰請輸家財令曰善卽歸散家財募武
健之士得千餘人而什伍之大署其旗爲義兵寇至
輒迎擊由是寇奪氣遣其徒黨來降嘉祐以爲此特
詐降以怠我師耳益訓練其衆候伺明年四月寇果
復擣縣郭焚廬舍入據縣治四出殺掠郡將勒兵致
討嘉祐率衆助郡將遂復縣治郡將駐縣中其帳下

士間出暴橫嘉祐乃排帳直入問郡將曰將軍之來
吾以爲欲爲民除殘也豈意乃助寇殘民乎郡將戟
手罵曰若真愚人我惟不忍民之殘於寇也故勒兵
而來除寇何迺謂助寇殘民嘉祐曰卽如是兵士暴
橫何不禁郡將遂拔帳前旗予嘉祐曰其樹之吾兵
士有敢擾吾民者立斬旗下嘉祐出旗樹於鄉宣言
曰將軍令擾民者斬此旗下於是士卒不復出縱出
亦不敢暴橫鄉井乃按堵令計事廉訪司廉使問令
縣有可與共患難者乎對曰有胡嘉祐文學趙存誠

者過其邑子也乃從旁言小人習知之此人以重義
著聞縣中嘗有人媚嫉之而誣污以大罪賴無左驗
得釋及其人賊殺家奴誣人事覺抵罪咸勸之曰此
報怨時也輒謝曰人以計傾我我亦乘其阨而傾之
人固可鄙而我獨非鄙人哉終不報怨凶年鄉人粉
草根木實以爲食誠諸子曰人皆飢餓我與若獨飽
安乎亟發廩賑之其他存恤族婣鄉黨之孤者寡者
疾病者未易以一二數此其重義蓋天性然也真可
與共患難者廉使乃爲檄署曰義士胡某使使卽軍

中授嘉祐俾統諸義兵殄寇且給以鎧甲之屬嘉祐
遂與方允中等引兵去縣五里而屯於鯉溪或言此
寇往來處奈何屯此嘉祐曰是乃吾所以屯此也吾
非以我等之眾足以殄寇也助官軍作聲勢捍蔽鄉
井耳我等在此則寇不敢越而深入寇不敢越而深
入則自此以西可保無他虞矣奈何不屯此時呂立
明壁方巖自守亦致書嘉祐曰君提孤軍當據衝恐
非萬全計爲君計者莫如去鯉溪壁方巖而共守焉
乃可萬全也嘉祐曰吾將排難以保鄉邑此吾眾之

所以集也若去難就易此皆爲身謀而不顧鄉里相
扶持之義者也我豈忍爲之不往而諸保受圍輒分
兵掾之往往以寡勝衆丁酉正月大破寇於武平於
合德二月又破之前倉乘勝追北至黃碧又明日寇
乃盡銳從間道繞出方巖呂立明與戰巖下其徒孫
伯純戰死嘉祐聞事急以明日黎明引兵往助立明
遇賊於占田遂大戰而寇至者滋多嘉祐顧謂方允
中等曰衆寡不敵矣退祇取覆也惟力戰耳自辰達
午戰不利方允中呂伯川死於陳嘉祐厲聲曰終不

令兩賢獨死義且戰且罵不旋踵死之縣令野速達而聞之曰嗟乎胡義士未嘗有斗祿寸組一旦緩急而能以私財私廩贍鄉兵屢挫賊鋒利安一邑吾屬爲天子命吏顧不知爲計至其斃於鼠輩又不能援之吾屬不獨大愧於心其負忠義士抑亦甚矣爲之流涕率諸義兵發喪而以禮祭之

史氏曰元制復一縣者賞官六品不幸而死於難則視其所當得官超一等褒贈之嘉祐於制得褒贈郡爲上請報未下而天兵取婺城褒贈竟不及矣洪武

已酉詔修元史嘉祐於法得立傳其子以事在前代
無裨聖朝既不敢以聞而時人又無能以其事送史
館以故秉筆者亦莫得而登載焉有如嘉祐之所樹
立豈以褒贈不褒贈立傳不立傳而加損哉夫其以
義自奮志在爲國殄寇以身徇之且猶不恤沉家財
乎斯可謂大忠矣苟無稱焉則何以激勸哉余過永
康父老爲余言是以具著之

金貞婦高傳

貞婦高名文奴溫之瑞安人年二十六平陽金幼芳

聘以爲婦明年生子暉暉生七月而幼芳以病卒金
故平陽富家盜起海上其家交川濱海焚掠蕩然無
遺繼以軍興盡賣其田供給幼芳卒高出簪珥鬻之
始克舉是時方左丞明善周總督從道日事兵爭幼
芳兄弟析居久矣攜其妻孥東西走避之不暇何暇
扶持高母子高煢煢襁負暉竄匿山谷間紡績以自
給艱苦之狀人至不忍見而高無毫髮怨懟意或勸
之曰世有壯子猶不足恃者此三尺孤又足恃乎遭
世多虞饒於貲者且不能全活況一弱婦且貧乏乎

不及時擇所從他日噬臍何及高曰我足一踐金氏
門知死金氏而已餘尙復何慮乎與其隳節幸生孰
若死飢死寒死兵也其植志堅不爲浮言所撼如此
暉七八歲日夜策勵之以詩書曰不學何以成人不
成人有子與無子何以異暉感母之言亦知自策勵
底於成立今年二十二歲矣高今年四十有七鄉人
士無少長咸稱之曰貞婦云

論曰人皆謂貞婦儒家女龍江書院山長高暘賓叔
其父也父講說經史貞婦自幼居父旁聞之故其見

義明其抗特操於艱苦之中喪亂之際固當於戲審如是則名爲儒者當何如哉然吾見緩急而奪志者亦多矣若貞婦豈惟世之爲人妻者愧之貞婦其可謂無愧於彝倫也已

王銘傳

廣威將軍指揮王公名銘字子敬和州人歲乙未平章豫國俞公起兵於無爲之海子口以應今上公往從之豫國公一見公大奇之留居帳下夏六月從攻下采石磯乘勝取太平而元中丞蠻子海牙復以兵

屯采石丙申三月豫國公與常忠武王合兵攻之公以驍勇俾居奇兵之列正兵方與之合公率諸奇兵大譟擣之其衆不能支遂破其水寨三月從攻陳也先營於殷巷拔之進克建康鎮江七月僞吳張士誠軍薄鎮江擊走之追奔至江陰石牌而還八月從攻常州會青軍叛去與僞吳軍合乃還軍援大將軍徐公於牛塘丁酉三月從攻下宜興七月與僞吳軍大戰於太湖流矢中左臂引刀出鏃復戰勇氣彌厲豫國公勞之曰力戰而創不恤壯士壯士李陵賢將也

其麾下士裹創而戰固當顧予何人而得此於爾哉
八月從攻朱州判軍於石牌戊戌四月復從豫國公
擊通州拔黃橋鵝項張榮等寨有白金文綺之賜遂
從攻雙刀趙於池州之樅陽冬十有二月從上親征
婺州庚子五月僞漢陳友諒軍入太平犯龍灣從豫
國公迎擊敗之逐北至采石公獨馳入其陣敵攢槊
刺公傷頰而公轉旋三周殺傷過當流血淋漓不顧
也賜文綺銀碗各一上察公忠謹辛丑六月拔於行
伍以備禁衛佩刀劔侍左右無寒暑朝夕頃刻不離

八月從上取江州癸卯八月僞漢軍犯南昌上親督
諸將往討之公被堅執銳扈從遇友諒於彭蠡湖之
康郎山聯舟酣戰湖水盡赤友諒軍敗退保鞋山我
舟蔽江面扼湖口者旬有五日友諒軍乏食出禁江
口求戰又大敗之友諒中矢死兩戰公賈勇爭先功
爲多尋分遣諸裨將撫定荆湖公往英山縣諭沈頭
陀等曰爾主連城數十方地萬里精兵百萬大艦數
千猶不能全而一旦送死禁江口爾等保區區尋丈
之險況能久生哉今大兵四出追討僞漢遺孽爾不

早歸順尙安所逃死乎弗聽遂加兵諸壁壘悉平有
功擢管軍百戶甲辰三月從黑丁指揮往擊廬州七
月克之八月往援安豐乙巳五月從常忠武王攻下
安陸襄陽九月還攻秦州閏十月克之丙午夏四月
轉擊淮安又下其秋上命諸將攻浙西公從常忠武
王直趨湖州之毗山與敵兵水陸鏖戰敵兵敗北直
抵城下公與有功僞丞相張士信悉境內精兵來援
屯於舊館出我師之背忠武王簡伉健士由大全港
繞入東阡復出敵背爲奇兵以分其勢且填壅溝港

絕其歸路公在行挺戈先驅盡晝夜之力又敗其援
兵僞元帥徐義之眾於烏鎮冬十月舊館降十有一
月湖州亦下遂攻蘇州大小之戰數十丁未九月蘇
州破擒士誠師還而公以十月分兵守禦松江洪武
元年春被旨佐翁德指揮守禦太倉二年二月制授
昭信校尉依舊管軍百戶四月從翁指揮捕倭寇海
上遇於海門縣之上幫及其未陣麾眾衝擊之所殺
不可勝計生獲數百人以獻復有白金文綺之賜三
年七月泉州漳州不靖從平章廖公往撫之悉定其